



Secziun da catschadurs Bostg

Andiast | Pigniu | Vuorz | Siat | Rueun

STATUTS DALLA SECZIUN DA CATSCHADURS BOSTG





Secziun da catschadurs Bostg

Andiast | Pigniu | Vuorz | Siat | Rueun

I. NUM E DOMICIL

Art. 1 La Secziun da catschadurs Bostg ei in'uniun tenor il cudisch civil svizzer art. 60 ff. Ella cumpeglia ils 5 vischinadis da Vuorz, Rueun, Pigniu, Siat ed Andiast.

Il domicil ei mintgamai el liug dil president.

La fuorma linguistica applicada duei plidentar omisduas schlatteinas.

II. INTENT E FINAMIRA

Art. 2 La Secziun Bostg ha per finamira da formar ses commembers e promover in bien spért cun tgirar ils interess dils catschadurs.

- a) Entras mantener la basa per ina sauna catscha da patenta en nies cantun.
- b) Entras ina buna tgira e bien quitau per ils animals selvadis. En special cun defender e proteger il spazi vital per nossas selvaschinas. Entras ina catscha commensurada, duei il diember dallas selvaschinas restar sauns ed adattaus al spazi da viver local.
- c) Cun esser commembers dall'Uniun cantunala da catschadurs da patenta (BKPJV), sco era dil district II dil BKPJV e renconuscher lur statuts e reglaments.
- d) Entras perseguitar e sedar giu spirontamein cun fatgs e politica da catscha ed esser neutrals en fatgs da partidas politicas e confessiunalas.

III. Commembers

Art. 3 Alla Secziun Bostg appartegnan en principi catschadurs cun domicil els vischinadis numnai egl art. 1.

Catschadurs senza domicil en in dils 5 vischinadis, che van en nossa regiun a catscha san era daventar commembers.

Art. 4 Commembers A (commembers da tschep)

Commember A sa mo quel daventar che posseda il dretg d'ir a catscha el Grischun, ed ei aunc buc commember da tschep en in'otra secziun dall'Uniun cantunala, commembers libers, d'honor, veterans e survegladers da catscha.

Mintga commember A ha il dretg da :

- far propostas
- votar
- vegnir eligius
- seprofitar d'acziuns dall'Uniun cantunala (BKPJV)



Secziun da catschadurs Bostg

Andiast | Pigniu | Vuorz | Siat | Rueun

-separticipar a scadin arranschament organisau dalla Secziun Bostg

Mintga commember A ei obligaus da :

- assister allas radunonzas
- ademplier las obligaziuns finanzialas dalla Secziun Bostg
- segidar tenor meglia saver e puder en tuttas spartas organisatoricas
- segidar tenor basegns vid la tgira en favur dils animals selvadis

Art. 5 Commembers B

Commember B sa mintga commember A d'in'otra secziun dall'Uniun cantunala (BKPJV) daventar.

Mintga commember B ha ils medems dretgs e las medemas obligaziuns sco il commember A, priu ora en fatgs dall'Uniun cantunala da catschadurs da patentia (art. 9 dils statuts dall'Uniun cantunala BKPJV).

Art. 6 Candidats

Candidats ch'ei s'annunziai el cantun Grischun per far la patentia da catscha, san vegnir recepiti en la Secziun Bostg sco candidat, senza dretg da votar e vegnir eligi. Suenter haver reussiu igl examen da catscha, daventan els commembers A.

Art. 7 Commember liber

In commember, che cumpletescha el decurs digl onn il 75avel anniversari ed ei staus duront 25 onns senza interrupziun commember A d'ina secziun, daventa commember liber. El paga negina contribuziun annuala, ha denton ils medems dretgs ed obligaziuns sco il commember A

Art. 8 Commember passiv ni fautor

Commember passiv ni fautor sa scadin simpatisant, che ha negin dretg d'ir a catscha el cantun Grischun e che sustegn la Secziun Bostg moralmein e finansialmein, daventar cun star en per ils dretgs dil catschadur Grischun e cun pagar la contribuziun annuala. El sa abbonar la gasetta da catscha entras la secziun.

Art. 9 Recepziun da commembers

La damonda da daventar commember dalla Secziun Bostg ei da drizzar en scret al president cun emplenir or il formular correspondent. Sur il recepir ni renviar in commember decida la Secziun Bostg cun maun pli da radunonza generala ni da radunonza da primavera.

Encunter in'eventuala refusada d'in commember A sa tal far recuors a scret tier la suprastanza centrala dall'Uniun cantunala Grischuna da catschadurs da patentia (BKPJV) e quei enteifer 30 gis. La suprastanza centrala decida definitiv.



Secziun da catschadurs Bostg

Andiast | Pigniu | Vuorz | Siat | Rueun

Art. 10 Extrada da commembers

In'extrada ord la Secziun Bostg ei da drizzar a scret al president sil pli tard 4 jamnas avon la radunonza.

Cun l'extrada sco commember piarda quel tuts dretgs visavi la Secziun Bostg, sco era vid lezza facultad. Per igl onn current eis el denton aunc obligaus d'ademplier las obligaziuns finanzialas visavi la secziun.

Art. 11 Exclusiun da commembers

Commembers che cunterfan als interess dalla Secziun Bostg e sesuttamettan buc a lezzas ordinaziuns, san vegnir exclaus sco commember entras la radunonza generala cun maun pli.

Paga in commember buca la contribuziun annuala alla Secziun Bostg, malgrad admoniziun a bucca ed a scret, vegn el exclaus tras la radunonza generala.

Cun l'exclusiun d'in commember piarda quel tuts dretgs e regress visavi la Secziun Bostg e sia facultad.

Encunter in'exclusiun sa il pertuccau recuorer a scret enteifer 30 gis tier la suprastanza centrala BKPJV. Quella decida definitivamein.

Art. 12 Commembers d'honor dalla secziun

Ina persuna ch'ei sefatga grondamein meriteivla per la Secziun Bostg, ni en fatgs da catscha, sa vegnir numnada sin proposta dalla suprastanza, commember d'honor entras la radunonza generala.

Ils commembers d'honor gaudan vinavon ils dretgs tenor art. 4 alinea 2, ein denton libers da tuttas taxas ed obligaziuns visavi la Secziun Bostg. Els dueien vegnir undrai cun surdar in present.

Miera in commember d'honor ni in commember A, accumpogna ina delegaziun dalla Secziun Bostg el tier il davos ruaus. Enstagl da flurs vegn fatg ina donaziun tenor giavisch dalla famiglia ni all'ARGO a Glion.

Art. 13 Distincziun da commembers

A personas che han prestau en ina sparta ni l'autra bia lavur sigl intschess dalla Secziun Bostg (p.ex. sco suprastont, cau da tgira local etc.), sa la suprastanza surdar in present sco renconuschientscha.

Quella distincziun deliberescha denton buca dallas contribuziuns ed obligaziuns.

Art. 14 Undrientschas dall'Uniun cantunala BKPJV

Persunas ch'ei sefatgas en general ni en ina secziun grondamein meriteivlas, el senn dall'Uniun cantunala, san vegnir undradas sin proposta



Secziun da catschadurs Bostg

Andiast | Pigniu | Vuorz | Siat | Rueun

dalla secziun ni dalla suprastanza centrala entras la radunonza da delegai sco suonda :

- a) Distincziun da meret (Verdientsauszeichnung)
- b) Distincziun da tgira (Hegeauszeichnung)
- c) Veteran cantunal
- d) commember d'honor dil BKPJV

Il modus per far diever dallas suranumnadas undrientschas per in commember ei perscrets els art.35, 36, 37 e 38 dils statuts dall'Uniun cantunala.

IV. ORGANISAZIUN

Art. 15 Ils organs dalla Secziun Bostg ein :

- a) La radunonza generala
- b) Las radunonzas extraordinarias
- c) La suprastanza
- d) Ils revisurs da quen
- e) La cumissiun da tgira

Art. 16 La radunonza generala

La radunonza generala ha liug mintg'onn el decuors dil schaner. Igl onn da fatschenta cuozza mintgamai digl 1. da schaner tochen ils 31 da december.

L'invitaziun alla radunonza cun la gliesta da tractandas ei da tarmetter a scret a scadin commember silmeins 8 gis avon la radunonza. In cuort preavis duei vegnir publicaus avon la radunonza el Fegl official dalla Surselva.

Tractandas dalla radunonza generala ein :

- 1) Appel ed elecziun da dus dumbravuschs
- 2) Approbaziun dalla gliesta da tractandas
- 3) Approbaziun dil protocol
- 4) Rapport dil president
- 5) Rapport annual dil cau da tgira e dil responsabel da tir e material
- 6) Rendaquen, rapport dils revisurs ed approbaziun dil quen
- 7) Fixar las contribuziuns annualas
- 8) Orientaziun ed approbaziun dil program da lavur
- 9) Conclus sur midadas da statuts e reglaments
- 10) Conclus sur propostas per mauns dalla suprastanza centrala
- 11) Mutaziuns
- 12) Elecziuns per ina perioda d'uffeci da 3 onns :
 - president
 - suprastanza
 - revisurs da quen
 - cumissiun da tgira (caus da tgira locals)
- 13) Elecziuns per ina perioda d'uffeci dad 1 onn



Secziun da catschadurs Bostg

Andiast | Pigniu | Vuorz | Siat | Rueun

-delegai e substituents tenor art. 15 dils statuts dall'Uniun cantunala
BKPJV

14) Honoraziuns

15) Varia

Ein singuls posts daventai vacants duront ina perioda d'uffeci, vegnan tals remplazzai la proxima radunonza per il rest da quella perioda d'uffeci.

Propostas da commembers per mauns dalla radunonza ein d'inoltrar en scret alla suprastonza silmeins 10 gis avon la radunonza.

Sur da propostas che figureschan buca sin la gliesta da tractandas sa la radunonza prender decisiun mo sche 2/3 dils presents (commembers A) ein persuerter.

Art. 17 Elecziuns e votaziuns

Elecziuns vegnan fatgas cun maunpli. Resalvadas ein las disposiziuns egl artechel 25 e 26 da quests statuts.

Elecziuns e votaziuns en scret vegnan fatgas sin proposta dalla suprastonza, ni sche 1/5 dils commembers presents pretendan quei. Tier elecziuns drova ei egl empren scrutini gl'absolut pli, el secund scrutini decida il relativ pli. Tier fatschentas materialas vegnan las **votaziuns** fatgas cun maunpli.

Ein las parts ulivas vala il suandont :

-tier elecziuns decida la sort, - tier autras fatschentas dat il president la decisiun.

Art. 18 Radunonzas extraordinarias

Radunonzas extraordinarias san vegnir convocadas entras la suprastonza ni sin giavisch exprimiu da silmeins 1/5 dils commembers A.

Concernent l'invitaziun valan las medemas determinaziuns sco en quests statuts art. 16 alinea 2.

Art. 19 La suprastonza

Tenor pusseivladad duein tuts 5 vischinadis vegnir risguardai per la suprastonza. La suprastonza consista ord :

- a) President
- b) Actuar/vicepresident
- c) Cassier
- d) Survigilader da material/responsabel da tir
- e) Cau da tgira

La suprastonza ei igl organ executiv dalla Secziun Bostg. Ella diregia tuttas fatschentas administrativas ed organisatoricas dalla Secziun Bostg ed ei cumpetenta da decider sche silmeins 3 commembers ein presents.

La suprastonza sa decider sur d'expensas entochen frs. 1'000.— per onn.



Secziun da catschadurs Bostg

Andiast | Pigniu | Vuorz | Siat | Rueun

En caussas da tgira e per la cumpra da muniziun ein las cumpetenzas exclusivamein tier la suprastonza.

Ils commembers da suprastonza ston haver il domicil el cantun Grischun.

La suprastonza, excepieu il president ed il cau da tgira, seconstituescha sezza.

Art. 20 La sottascripziun giuridica per la Secziun Bostg han :

- a) En caussa d'administraziun: il president ensemen cun igl actuar
- b) En caussa finanzas: il president ensemen cun il cassier
- c) En caussa tgira: il cau da tgira ensemen cul president

Art. 21 Pensums dalla suprastonza

Il president survigilescha e coordinescha tuttas fatschentas dalla Secziun Bostg. El meina las sesidas da suprastonza e las radunonzas. Medemamein exequescha el tutta corrispondenza, procura il rapport annual, survigilescha ils ulteriurs suprastonts e representa la Secziun Bostg anoviars. Sche treis commembers da suprastonza pretendan ina sesida eis el obligaus da clamar ensemen la suprastonza.

Igl actuar (vicepresident) redegia ils protocols da tuttas radunonzas, sesidas da suprastonza ed autras sedutas. El meina ina gliesta exacta da tuts commembers e tarmetta a temps las mutaziuns all'Uniun cantunala. Plinavon duei el menar ina cuorta cronica sur d'eveniments da pli gronda muntada. Sur d'activitads d'ina certa impurtonza duei el rapportar ella gasetta dil gi ni en quella da catschadurs. Plinavon segida el cul president e remplazza lez en cass d'absenza.

Il cassier meina la cassa ed administrescha la facultad dalla Secziun Bostg. El fa gl'incasso dallas contribuziuns, e fa giu quen cul cassier central. Avon la radunonza generala, suttametta el il quen als revisurs.

Il survigilader da material / responsabel da tir ei responsabels per in bien manteniment dil stan da sittar, sco era dil material e meina ina gliesta d'inventari da tut material (incl. preit da trofeas). El organisescha e survigilescha ensemen cun ils consuprastonts il tir intern tenor il reglament dalla Secziun Bostg, resp. tenor il reglament da tir dall 'Uniun cantunala BKPJV. Suenter mintga tir procura el per in rapport a scret per mauns dalla radunonza.

Il cau da tgira ei responsabels per in continuau menaschi da tgira pils animals selvadis conform allas prescripziuns da tgira cantunalas e da nossa secziun ed al concept da tgira dil district da catscha II



Secziun da catschadurs Bostg

Andiast | Pigniu | Vuorz | Siat | Rueun

El survigilescha ils caus da tgira (locals) dallas vischnauncas e procura per mauns dalla radunonza in rapport annual sur da sias acziuns. En fatgs da tgira representa el la secziun anoviars.

El ei era organ da survigilanza tier la punctaziun da trofeas.

Art. 22 Ils revisurs da quen

La radunonza elegia dus revisurs da quen. Ils revisurs controlleschan mintg'onn avon la radunonza generala ils quens e rendan rapport en scret alla radunonza generala. Els han il dretg da controllar il quen current e bilanza sco era ils protocols.

Art. 23 La cumissiun da tgira

La cumissiun da tgira secumpona da 6 persunas, numnadamein:

- a) Il cau da tgira sco president
- b) 5 caus da tgira locals dils vischinadis
- c) President e survigilader da catscha cun vusch consultativa

Scadin cau da tgira local sa era appartenen alla suprastanza dalla Secziun Bostg.

Il cau da tgira organisescha igl entir menaschi da tgira dalla Secziun Bostg ensemen cun ils caus da tgira locals.

Ils caus da tgira locals ein responsabels en lur vischinadi pil menaschi da tgira. Els procuran per sufficient personal dad exequir igl entir menaschi da tgira e dattan giu lur rapport en scret al cau da tgira dalla Secziun Bostg.

Determinaziuns pli detagliadas pertuccont la tgira, ein reglamentadas en in reglament special da tgira dalla Secziun Bostg sco era el regulativ cantunal da tgira.

V. FINANZAS

Art. 24 Las contribuziuns annualas dils commembers A, B, candidats e passivs vegnan fixadas dalla radunonza generala sin proposta dalla suprastanza.

Ils commembers da suprastanza dalla Secziun Bostg sco era ils commembers honoraris ed ils commembers libers (BKPJV) pagan negina contribuziun annuala.

Per suranumni commembers (art. 24, alinea 2) surpren la Secziun Bostg la taxa per igl abbonament dalla gasetta da catschadurs (Chatschadur Grischun).

Als delegai alla radunonza cantunala BKPJV paga la Secziun Bostg las spensas da viadi, la tscheina ed il star sur notg, sch'ins sa buca pretender il retuorn la notg muort la distanza.



Secziun da catschadurs Bostg

Andiast | Pigniu | Vuorz | Siat | Rueun

VI. DETERMINAZIUNS FINALAS

Art. 25 Ina revisiun parziala ni totala da quests statuts ei resalvada alla radunonza generala ni extraordinaria. Quella ei autorisada da decider sche tala ei publicada sin la gliesta da tractandas. Las midadas ston vegnir acceptadas cun ina maioritad da silmeins 2/3 dallas vuschs dils commembers presents.

Art. 26 La soluziun dalla Secziun Bostg sa succeder mo sche il diember dils commembers A sesminuescha sut **15** ed igl ei buca da quintar cun in carschament da commembers els onns proxims.

Tier ina soluziun dalla Secziun Bostg va igl entir menaschi da facultad da cassa e protocols vi alla suprastonza centrala BKPJV per l'administraziun per ina eventuala nova secziun.

Vegn ei fundau negina secziun da catschadurs enteifer 10 onns sil territori dalla Secziun Bostg, croda la facultad vi all'Uniun cantunala BKPJV.

Art. 27 Quests statuts ein vegni approvai dalla radunonza generala, dils 14-12-2016 e remplazzan ils statuts dils 02-05-2014. Els van en vigur suenter l'approbaziun entras la suprastonza centrala BKPJV.

En num dalla **SECZIUN DA CATSCHADURS BOSTG:**

Il president

Claudio Carigiet

Igl actuar

Arno Spescha

Approbaziun entras la suprastonza centrala

Ils statuts dalla Secziun Bostg, dils 14-12-2016 ein vegni approvai dalla suprastonza centrala BKPJV ils 11.1.2017

Il president central :

Robert Brunold

Il vicepresidente central :

Christian Kasper